



Dentro di 3 pa 6 luna

# Lo kier wak e museo ta forma parti di un fundacion

encarga cu museonan na Aruba

**DIARAZON** ultimo Minister Otmar Oduber a reuni cu trahadornan di Museo Arkeologico Aruba p'asina presenta e plan cu su ministerio tin pa loka ta museonan na Aruba.

E mandatario a duna di conoce cu Gobierno tin un maneho poni padilanti pa cultura y despues di e Cumbre Nacional di Cultura cu a tuma lugar aña pasa a hiba diferente combersacion unda cu a planta e vision nobo pa loka ta museonan na Aruba.

Actualmente tin dos museo na nos isla, Museo Historico y Museo Arkeologico, pero na caminda tin 3 museo mas cu Gobierno ta sostene den cuadro di diversificacion cu tin y oferta cu mester tin pa nos turismo, al igual cu crea oportunidadnan pa desaroya San Nicolas como nos di dos capital turistico enfoca riba tereno cultural y historico.

Asina ta bay tin e museo na Watertoren, e museo na Nicolaas Store y tambe e Carnival Museum. Di e forma aki lo bay tin 5 museo na Aruba, unda cu e museonan na Watertoren y Nicolaas Store lo mester ta cla e aña aki ainda y Carnival Museum na 2016.

Minister Oduber a sigui splica cu a combersa cu e Fundacion existente cu t'esun di Museo Historico pa convirti'e den un 'overkoepelend orgaan' ya haya oido pa cu esaki y e tumando lugar. Den siman benidero Notario lo mester pasa e acta cu e cambionan, specialmente e cambionan cu ta acapara e vision nobo di tin tur e museonan bou di un dak.

E cambio aki ta trece diferente beneficio cune, manera ta reduccion di gastonan ya cu cierto funcion lo ta centraliza manera ta mantencion, mercadeo y publicidad, mientras cu cada museo lo keda tambe cu nan maneho individual, cu nan mesun conservator bou di un curator y un bestuur di 7 persona.

E mandatario a conta cu e reunion cu e empleadonan di Museo Arkeologico, of den e caso aki Departamento Arkeologico a bay hopi bon unda cu a presenta e plannan, e structura cu e fundacion lo ta hinca den otro, kico t'e garantianan cu lo tin p'e empleadonan. "Mi tin cu bisa cu e tabata un reunion hopi habri. Ya caba hopi aña pasa a wordo bisa cu un dia e lo tin cu bira un stichting, esey tabata e condicionnan tambe pa Union Europeo e tempo aya por a hinca e cantidad di miyonna cu a wordo hinca den Museo Arkeologico.

El a dura demasiado p'e departamento wordo converti den un stichting y aworaki den cuadro di e vision nobo nos ta mira cu e ta fir perfectamente pa por cay bou un structura asina.

Intencion na final ta pa crea entradanan adicional, pa ta mas independiente, pa por conserva, preserva

y tambe duna mas atencion na e parti di arkeologia y investigacion y asina prepara mas material pa futuro", Minister Oduber a duna di conoce.

El a agrega cu posiblemente no lo mira e consecuencianan di esaki di biaha, pero a lo largo e lo nifica hopi pa nos.

Esaki t'e prome combersacion cu e empleadonan y lo kier wak cu den e proximo 3 pa 6 luna e lo por wordo concretiza. Esey nifica cu lo bay forma un comision cu lo traha cu envolvimento di empleadonan tambe pa por logra e meta di forma e fundacion cu tur e museonan bou di dje.

Loke e mandatario a indica na final ta cu el a compromete su mes cu tur e empleadonan di museo lo bay over y cu nan no lo bay atras den nan posicion cu nan ta n'e momentonan aki.

